

NEHEMÍAS

Jawen unanmati janchaki

Persia xanen ibujaida Nehemías dayaxunbiai jawen xenipabun maewan Jerusalénwen nuikin mishki kenebauni di anibu bena wakatsi ikin jawen tsuma xanen ibujaida yuka nichinikiaki. Jerusalén Dioski nukuti jiwe jayabia ja mishki kenebaunkin benawakin junediabuma janu jiweabu jawen dakeabu mae betsa ja dapi jiwebaunabun jatuki kaxekubainaibun jatun xanen ibujaida kushipa jayamaken jatun mae mishki kene tsuan pewama inibukiaki. Jawen mishki kene ma bena watan jawen benimaibun Levín enabun Jehován jancha jatu yusinkubainaya ana chibankin taewanibukiaki.

Nehemíasin jawenabukidi Dios yukaxunikiaki, na janchadan

1 ¹Na miyuidan, jaska ea Hacialásin juni bake Nehemías en jiwekunkainaidiki. Janua Persia nawa xanen ibujaida Artajerjesin jatu yunukubaini ma 20 año kaitian uxe betsa Quisleutian xanen ibun maewan Susa anu ea Nehemías en dayai jiweken ²en betsa Hananí inun juni betsabú Judán enabun mai pakea anua bui jikiabu Jerusalénkidi inun Babilonia xanen ibujaidatun nukunabu jatu iyuaibun jabu Judíobu paxanibukidi en jatu yuka ikaya ³ea kemakin yuikin: “Nawabun jatu achiaitian paxanibudan, pakubaini nukun mai pakea anu bikajaida tenei dakeyabi jiweabuki. Jamen Jerusalén anudan, chakabudiki. Mishki kenebaunibu bedan keyunibu mania inun janu jikiti xui beputi tibi chiwen kuakin keyudianibuki”, ea wabu

⁴ea jaska wabu jaska kaka ninkatan tsaua en kaxayamaki. Janua xaba jatida punu nuka samakekin Dios nai anuabe janchakin ea akin ⁵yuikin: “Dios nai anua Jehováan, min mekenika Dios kushipa meseki. Tsuabunda mia bechipaikin min yunuti jancha inun min nemati jancha chibankin akubainaibuwen nuikin jaska min jatube yubakani jeneama shinankin min akubainai. ⁶Jaskawen taexun xaba inun meshu medan tibi Israelin enabu min tsumabu en mia jatukidi yukaxunkubainmis min ninkanun ikis en mia ana ea akaii. Nukubunan, natian nun unaiin. Israelin enabu

mikidi nun chakabujaidakubidanimabuki, enabu inun eadan. 7Min nuku uinbiaya nukudan, Israelin enabu nukun xenipabu inun nukubu chakabujaidai nun jiwekubidanimabuki. Jaska wakin min tsuma Moisés min kenemani min yunuti jancha inun, min nemati jancha inun, min yusinti jancha min nuku yuini jawa ninkakin jawa chiban pewama nun jiwekunkainaii. 8-9Bebunkidi nukun xenipabu yuikin: ‘En jancha danankin man chakabuwakubainaibu nawa betsa betsapa mai jidabi manibaunabu anu en matu sa axanaii. Jakia ekidi shinan betsa watan en yusinti jancha ana ninkakatsis ikin man ana ea pe chibankubainaya kupikin mai kesua chajaida anu matu nichinkin matu sa abianixun jadia iwekin januxun ean en matu unantiwamakin en kena netankin en medibi wakin katuni anu en ana matu iwexun jiwemaxanaii’, akin jaska min Moisés yuini shinaindawe, jakimamadan.

10Nuku ichakawaibu jatu nemakin min kushipawen min nuku mekekubainiwen taea nun minabuki, min tsumabudan. 11Mibe janchakin en mia ea akai ea ninkawe. Jehovahán, en xanen ibu Artajerjes ewen nuimawe. Ja en xanen ibu ewen nuikin ekidi pe shinanyan jaskawen taexun en mia duawakatsi jaskakidi en mia yukaii”, anikiaki.

Jerusalén anu Nehemías kakatsi ikaya Artajerjesin nichinikiaki, na janchadan

Ea Nehemíasinan, xanen ibujaida Artajerjesin nuxuti pewakin jawen kenchaki juxkexun dau jayamenkain, iwanan, ean dukun metan jawa dau jayamaken en amakubainiki.

2 1Artajerjes xanen ibui ma 20 año kaya uxe Nisán anu xaba betsatian jawen vino en amai en punu nukajaida ea uinkin 2ea yukakin:

—Min punu nukajaida en mia uiaiin. ¿Min jaskai ikai? Min isin teneamabia ¿jaskai jawa shinanjaidai min punu nukamen?— ea wa ea jaska wakin datea dateyabi 3en xanen ibujaida yuikin:

—¿Xanen ibuun, jiweyukunkainwen! Chanima na en punu nuka min ea uiainan, ja maewan anuxun en xenipabu maiwapaunibu jatun mishki jiwe inun kenebaunibu ma jatuki di iki keyuni inun jawen xui beputi tibi kuabidanibuwen taea en ana jatu uinsma jaska shinain en punu nukajaidaki— en wa

4xanenibun ea yukakin:

—¿Mia jaska waxunkin en mia medabewatidumen?— ea wa jau ea medabewanun Dios nai anua en juntinin yukatan 5en xanen ibu yuikin:

—Xanen ibuun, jaska en mia dayaxunai min ea bechipaiai keskadan, min en xanenibun ekidi jaska pe shinankin min ea yunuadan, Judán mai pakea anu kaxun janu en xenipabu maiwanibu anu uinkin en jatun mae ana pewakin en jatu bena waxunkatsis ikaii— en waya

⁶Jawen ain xanen ibujaidadi ja dapi tsauken xanen ibun ea kemakin yuikin:

—¿Jadi kadan, jati año min chintunun ika ikai?— ea wa

ja baditian en juxanai en yuia ea nichinun ika xanen ibu benimakin:

—Katanwen— ea waya ⁷januxun ean yuikin:

—Judán enabun mai pakea anu en kai jau ea nemayamaxanunbun Jene Éufrates ukedi badi kaikidi jiweabu jabun yununikabu xanen ibu bexmasbu yunukin ekidi ea jatu kenexunwen, jaska min bechipaiiai keska wakinan. ⁸Ja inun, min yunua betsadan, jatun ji xukua mekea jawen kena Asaf anu ea jatu kenemaxundiawe. Dios kenwanti jiwe beputi inun, mae mishkiwen kenebaunibu jikiti xui beputi en waxanai inun janu en jiwexanai anu en beputi en waxanai jau ea yunuxanun ea yuixunwen— akin en Dios nuikipajaidatun ea medabewaya shinankin en xanen ibu en yuia jaska en yukai keska ea medabewayamaki.

⁹Kai Jene Éufrates ukedi badi kaikidi jiweabu yununika xanen ibu bexmasbu xanen ibujaidatun jatu kenexunshina en jatu inaniki. Ea jaska besti nichianma jau jabun ea mekebainun jawen detenamenikabu xanen ibu bexmasbu inun caballowen katsaumbainmisbu ichapaya ebe xanen ibujaidatun jatu yunuyamaki. ¹⁰Israelin enabu medabewatanun ika en ma jikiken Horón anua Sambalat inun Amón nawa yununika bexmas Tobíasin ninkatan jawa jabun jaska bechipaiama inibuki, tsua juxun Israelin enabu medabewai uinkatsi ikamadan.

Jerusalén mishkiwen ana kene benibaunkatsi yubakanibukiaki, na janchadan

¹¹Janua kakunkaini atimas Jerusalén anu en jikishina janua 3 día juindukuntan ¹²Jerusalén anuxun jawada en axanai Diosun ea shinanmaima jawa tsua yuiama meshu medan bututan en juni eskadabesbetan uin kai ea besti caballoki katsaumea kauani ¹³jabias meshu medan napaku anu pukinibu jawen kena Dragónkidi jikiti xui anu june taxnikaini inun, janu chaka putamisbu jikiti xui kidi kawankin Jerusalén mishki kenebaunibu di akin keyunibu inun, beputi tibi kua keyunibu uinkubauni ¹⁴janua kakunkauni unpax jabai beputi bebun kematan xanen ibun unpax aduti mai pukinxun mishkiwen kebenbaunibu anu niti itan mishki kebenibuwen taea jadakidi en caballo katimaken ¹⁵yamenapun meshubiaken paxku debu chai dunkeatankin mishki kenebaunibu di anibu uin keyutan jabias bai nun kawen ana jawendi chintunkidani jabias paxku debu anu beputi kiniwen nun jikiniki.

¹⁶Jaska shinain meshu medan en katanxu inun jaska yubakakatsi en uiantanshina nukunabuma nawa yununikabu xanen ibu bexmasbun ea jawa unanbumaken ja dikabi nukunabu Diosbe janchaxunikabu inun, jabu dukun nukun xanen ibubun enabu inun, nukun xanen ibu bexmas

yununikabu inun, dasibi Judío junibu dayaxanaibu en jaska shinain en jatu banabimadiama iaketanshina ¹⁷atimas jatu ichawatan yuikin:

—Jerusalén dasibi di akin keyunibu inun jikiti xui beputi dasibi kua keyukin nuku nuitapawanibu man unanjaidaii. Jau nukuki ana kaxeyamaxanunbun eki dasikanwen, Jerusalén mishki kenebaunibu di anibu ana benibaunkin bena wakin nun pewanunbunan— akin

¹⁸jaska Diosun ea duawakin medabewashina inun jaska Persia nawa xanen ibujaidatun ea pe yuishina en jabu yuia jabun ea kemakin yuikin:

—¡Jaskakenan, dayai taedibaunankanwen!— iki dasibibundi jatu benimawakeakeaibun ¹⁹en jatu jaska wai en jancha ninkabidan Horón anua Sambalat inun, Amón nawa yununika xanen ibu bexmas Tobías inun, Árabe nawa Guésem nukuki kaxekin nuku jancha chakabuwakin ea danankin yuikin:

—¿Man nuku jaska wanun ika ikai? ¿Persia xanen ibujaidatun jancha man daka danain ana jaki sinatakanai?— ea wabu

²⁰entsedi jatu kemakin:

—Dios nai anuatun nuku yunushinxun dayamakin dasibi nuku pe keyumaxanaiwen taexun nun jawen tsumabunan, maewan mishkiwen kenebaunkin nun taewaii. Jakia matudan, Jerusalén anu man ibia man nukubemaki. Man ana jawa nuku yunutidubumaki. Jawaida dasibibun matu jakimakin tsuan matu ana shinanma ixankanikiki— en jatu waniki.

Judán enabuki sinatai jatuki kaxenibukiaki, na janchadan

4 ¹Jerusalén mishkiwen kenebaunibu di anibu nun ana bena wakin pewakin taewaya Sambalatin ninkatan pubein nukuki sinatajaidakin Judfobuki kaxei taekin ²nukukidi jawen jaibuaiibu inun Samaria anu detenamenikabu Sambalatin jatu yuikin: “Ja Judán enabu pitiuma mawabaiidan, ¿jaskada shinain dayai ikanimenkain? ¿Jawen mekenika Dios kenwankin inabu nami ana menuxunaibu nun jatu nematiduma dabanen jaska shinain ikanimenkain? ¿Jawen kene benawakin xaba bestichai keyutidubu shinankanimenkain? ¿Mishki datsa kene pewanibu menunibu anua jawen mishpu bena watidubumen?” jatu waya ³ja dapi nixun Amón nawa Tobíasin kaxewakin jatu yuikin: “Benawakin keyubiabu mishki kene babui kaman inu jaki inakaina di ixanikiki”, ikin usankin jatu yuia,

Nehemíasin Dios ea anikiaki, na janchadan

⁴jabu nukuki kaxeaibu ninkatan ean Dios ea akin: “Nukun mekenika Diosun, jaska nukuki kaxeaibu jatu ninkakubainwen. Nukukidi jancha chakabubiaibun jatun chakabu ana jatuki chintunmawe. Ja jatuki sinataibun jau jatu maemakin achixun jatun mae chajaida anu jau jatu

iyuxanunbunwen. ⁵Jerusalén mishki kene benawakin pewabaunaibu jatuki enjen ikaibuwen taexun jatun chakabu buaxunama mia bebunua jatu jakimayamaxanwen”, aka

Ja jatuki sinataibu Judán enabuki yubakanibukiaki, na janchadan

⁶mishki kene dayai jeneama akubaini nukunabu benimai shinan chankain dayajaidakin ma benibaunkin jawen keyatapa namakis wabainaibun ⁷Jerusalén mishki kenebaunibu di anibu ana benawakin akubainkin xui wanibu bepukin ma taewaibun ninkatan Sambalat inun, Tobías inun, Árabe nawabu inun, Amónen enabu inun, maewan betsa Asdod anu jiweabu nukuki sinatajaidakin ⁸jatun detenamenikabu jatu yunukin Jerusalén achikin detekin chakabuwaxanun ika dasibi icha yubakashinabuwen ⁹taea jau Diosun nuku medabewanun Dios ea atan xaba inun meshu medan tibi jau jabun nuku uinkin nuku mekekubainunbun nun jatu nichinbauna ¹⁰janua Judán enabun datekin ea yuikin: “Mishki di akin tude tude anibu ichapajaidawen taea nukun dayadu jin iki unanyamasaiibuwen taea mishki kenebaunkin nun keyutidumaki”, ikaibun,

¹¹jabiatiandi nukuki sinataibu nukun mae medan jikibidan nun jawa uianma inun nun jawa unanma jabun nuku detebaunkin nukun daya nuku jenematidubuki. ¹²Jakia nukunabu Judán enabu jatu dapi jiweabun jatun jancha ninkakin nuku yuinun ika jabu bebidan bebidankin nuku yuikin: “Matun mae kebauntan jikibidankin matu detexankanikiki. Uindakanwen”, nuku abidan abidanaibuwen ¹³taexun jau jabun nuku uinxununbun mishki kene uke medan jiwe ibu tibi jawenabu junibuyabi jatun machatu chaipa kenujaida inun, jatun jashi chaipa inun, jatun pia ichapaya janu kene chanpa anu inun bexpa anu jau mapubaununbun en jatu yunua ¹⁴jakia jabu buabuma dateaibu uin benitan xanen ibumisbun enabu inun, yununikabu inun, juni betsabu ean jatu yuikin: “Jawa dateyamakanwen. Nukun mekenika Jehová kushipapaida ja besti meseki shinankanwen. Jaska shinankubainkin matun betsabu inun, matun juni bakebu inun, matun ainbu bakebu inun, matun ainbuaibu inun, matun jiwe dasibi mekei nukuki sinataibu jatu detexunkubainkanwen”, en jatu wa, date maintan jaska en jatu yunua ikaibun

¹⁵jatu nemanun ika ma dasibi nun pei keyuabun ja inun jabu jaska nukuki sinataibu yubakaibu Diosun jatu itimaska wakin keyua jabun nuku ninkatan jatun mae anua beabumawen taea nukubun mae mishki kenebauni janu bestibu tibi nun dayashinabu anu nun ana taeaibun ¹⁶en jatu jaska wa en junibu namakis betsabu ana dayakubainaibun jabiatiandi jatun detenameti mabuya jatun jashi inun jatun yuda nemati mane tuduakea inun, pia inun, jatun mane tadi sawexun dayaibu mekea mapubaunabun Judán enabu xanen ibu bexmasbun jatu

medabewakubainaibun ¹⁷janua jabu dayakin mishki benibaunaibu jabun mabu jatu iaxunaibu meken betsawen jatun machatu chaipa tsumatan janua meken betsaudi mishki inun mabu betsa jatu bixuntantanaibun ¹⁸jabun mishki kenebauni dasibi dayaibudan, jatun machatu chinexeketiki usuan dayakubainaibun janua ja jatun trompeta nuku chan axuntidu ebe nikunkainaya ¹⁹dayai nun paxkadiamaken xanen ibumisbun enabu inun, yununikabu inun, juni betsabu ean jatu yuikin: “Nukun daya ichapa chaipaki. Nukun mae kenebauni benanta paxkatan xukua tibi nun dayakanaii. ²⁰Jaskawen taexun nukuki sinataibu ma kemaibun ninkatan trompeta chan chan akaya nukuki dasi bukin matun detenametiya buxankanwen. Nukun mekenika Dios nukube detenamexanikiki”, en jatu wayamaki.

²¹Nuku jaska wabiabu xaba tibi badi chaitanai mishki bebidan bebidankin manchinkubainaibu junibu jatidi dayaibun jatidi betsabun jatu kexexun jashi tsumaxun uinbauni mapui badi jikikainaya dayai jenekubainaibun ²²nun jaskaitian dasibibu nun dayakapabu inun nukun medabewanikabu junibu jatu yuikin: “Jerusalén jidabi nun dayai anudan, uke medan mekebauni meshu medan kexea jadi uxai inun badidi nun dayaitian nuku mekei jau mapukubainunbunwen”, akin jatu yunutan ²³jatu yunu bestiama eadi bika tenenun ika enabuya inun, en medabewanikabu inun, jabun ea kexea detenamenikabu ebe bumisbu jabubetan nukun tadi pekama bestibu tibi nukun chachitiya nun uxakunkainiki.

Jaska Moisin Diosun jancha keneni dasibibun ninkaibun jatu yuixunibukiaki, na janchadan

^{73b}Jatun mae tibi anu Israelin enabu uxe 7tian ma beima jatun jiwe anu maniabun

8 ¹Jerusalén anu janu unpax biti beputi xui bebun jemaintin xaba ewapa anu yudan kaian dasibi janus ichabun jaska Jehován Israelin enabu shinanmakin jawen yunuti inun jawen nemati jancha una medan Moisin jatu kenexuni jau benun kenenika yusinan Esdras yuiabu ²ja dukun xaba inun uxe 7tian nukunabu Diosbe janchaxunika Esdrasin una Moisin jawen yunuti inun jawen nemati jancha keneni bexun junibu inun, ainbuaibu inun, bake mishtinbu jabun ma ninkaibu janus ichai keyuabu anu jatu bebun bexun ³⁻⁵unpax biti beputi xui jemaintin dapi xaba ewapa anuxun yudan kaian ichabu jatu bebun juxun penamajaida kene yuitiaxun yuikubainkin badi manananbi jau jenexanun tapu keyatapa ashianbu anu Esdras nia ja dapi jawen yusiudi Matatías inun, Sema, inun, Anías inun, Urías inun, Hilquías inun, Maaseías mapuabu janua betsabu jawen yusmaudi Pedaías inun, Misael

inun, Malquías inun, Hasum inun, Hasbadana inun, Zacarías inun, Mesulam mapudiabun Esdras jau uinkin ninka pewanunbun manaundi nixun dasibibu jatu bebun Moisin kenei una bepenxun jatu yuikin jaska wai uinkin ninka pejidawai dasibibu beni keyuabun ⁶januxun Jehová mekenika Dios kushipa dasibi binu keyuatun jancha ichapawen Esdrasin kenwankubainaya ninkai dasibibun meken meshain keyuxun kemakin yuikin: “¡Jabiaskaki! ¡Jabiaskaki!” iki keyutan dasibu danti iki maiki beti ixun Jehová kenwanta benitan ninkai tsauabun Esdrasin jui kushipawen unanxubida jatu yuixunkubainaya ⁷janu jabun Esdras medabewakin Levín enabu Josué inun, Baní inun, Serebías inun, Jamín inun, Acub inun, Sabtai inun, Hodías inun, Maaseías inun, Quelitá inun, Azarías inun, Jozabad inun, Hanán inun, Pelaíasin tsauabu jatu yusinkin ⁸Diosun yunuti inun jawen nemati jancha unaki kenei jui kushipawen yuikin jau xabakabi ninkakin tapinunbun Diosun jancha shinanmati xabakabi jatu ninkamakin yusinkin jancha maewakin jatu jaska wanibukiaki.
